

後樂堂集

後樂堂文鈔卷三

鹽城陳玉樹惕庵著

論時文

噫嘻乎悲哉人之繫於獄也攀梏其手執持欲墜桎械其足步武欲蹶則困弱甚矣禁錮深室使不得出窈窈冥冥不知陰晴所聞不過衆囚之言所覩不過衆囚之形雖有耳目無所用其聰明則昏昧甚矣獄吏欲飢飢之欲寒寒之欲鞭鞭之欲扑扑之獄官欲徒徒之欲流流之欲絞絞之欲斬斬之與牢羊檜豕無以異也噫嘻乎悲哉人之繫於獄也今試士之時文何以異是限以功令多所避諱拘牽理法以爲繩墨此梏桎而困弱之象也不曰爲國家立功勳曰爲聖賢立言有用之心思才力沉埋於八股之內迂腐之聲音顏色逼人於百步之外搖其首攢其眉聳其肩動其股高吟而朗誦者非八銘塾鈔則目耕齋也非仁在堂則道生堂也詰以古今中外之事訊以安危理亂之故則口瘡目瞪

不能置一辭此禁錮而昏昧之象也則謂之獄焉可也然而舉十八行省之士習而安之顧而樂之而不覺其弱昧者何也曰此固富貴之所自出也吾聞繫獄久者衆囚推之爲長唯其言是聽爲之長者亦顧盼自喜凡繫獄者縣官日給餐錢後進獄者必輸資於其先進囚之獄囚亦有贏餘以權子母然則獄之中自有所謂貴與富者故雖有桎梏禁錮之苦亦視沮洳塲爲安樂國而不顧刀鋸之隨其後矣無怪習於時文者之以爲可安可樂極困弱昏昧之甚而不自知也然而此安樂豈可悠久吾恐西人來爲獄官獄吏而飢寒鞭扑唯所命徒流絞斬無所遁也此可爲慟哭流涕長太息者也或曰我朝以制藝取士積二三十年矣合前代計之近八百歲矣今乃以囹圄擬之無乃過乎予曰近日風會大變氣象迥殊天時人事無一不異於昔南溟小西洋城郭舟楫之國唐宋以來列王會者以百計而今亡矣氣球電綫鐵路無烟

藥後膛鎗機器礮水雷魚雷之艇鋼甲鐵甲之船昔所未聞者而今盛行矣昔之良醫今庸技也昔之勲旅今弱卒也昔之巧工今拙匠也昔之利械今鈍兵也昔之急遞今緩郵也昔之巨艦今扁舟也昔之大燭今小明也皆時爲之也制藝之昔似博大而今見狹小也昔逞聰明而今等聾瞽也亦時爲之也然而時文之中非無豪俊使之究心於強兵富國之術則豪俊見矣犴獄之中自有材武使之馳騁於金戈鐵馬之場則材武見矣如使拘攣其手足掩蔽其耳目而欲期之以材武也此必不可得之數也吾故曰時文一日不替人才一日不興華威一日不振則謂縲絏中人誤之可矣雖然天下之困厄於中而輩莫能脫篤守其舊而牢不可破者皆獄象也獨時文云乎哉

鎮海劉崇照曰 朝廷雖以時文取士並非令士子專習時文亦非令試士者專取時文然試士者舍此別無知能不得不專以此爲進

退求名者舍此別無徑途不得不專以此爲學業則禁錮天下之士者非功令實考官也然功令不改而求彥髦講貫經濟之學難矣以固固比八股詞意似激然顧景范先生有云祖龍坑儒不過四百時文坑人極於天下後世二百年前已有爲此說者矣况今日哉

中國禁錮之害有三曰時文曰鴉片曰婦女纏足三大害不除必無自強之術道光時龍巖饒孝廉廷襄嘗云明太祖以梟雄猜忌取天下懼天下魄偉絕特之士起而與爲難求一途可以禁錮天下生人之心思材力不能復爲讀書稽古有用之學者莫善於時文故毅然用之其事爲孔孟明理載道之事其術爲唐宋英雄入彀之術其心爲始皇焚書坑儒之心林文忠公以爲快論此篇蓋卽饒孝廉禁錮之說而暢發之危言悚論雖賈長沙之痛哭不是過也夢夢者仍沉

述不悟何耶受業左榘謹註

論朝鮮 庚辰冬十月

朝鮮雖處東溟直隸山東東三省之藩籬也其俗秀良好學其王恭順  
天朝其地南與倭鄰其人畏倭如虎而不敢與爭明萬歷中平秀吉  
據其東京破其八道昭敬王啓出走義州中國勞師七載喪師數十萬  
糜餉數百萬而兵竟不能罷者恐倭得鮮明史朝鮮傳有單稱鮮則勢者如鮮遼雜處是也益張也倭據平壤則鴨綠一葦可杭遼右失其險阻據閑山則登萊天津皆可揚帆而至而京師失其門戶其爲害豈淺鮮哉然則明人之爲朝鮮謀者亦卽自爲謀也今倭旣滅我琉球又侵我朝鮮鮮人畏其勢盛割地以瓦市倭之視鮮不啻在掌握中矣而俄羅斯又垂涎而耽耽焉必欲與鮮通商鮮人堅執不可以積弱不振之鮮當日俄兩國之强大勝負之數不待智者而後知也以俄之地廣東西北三面臨海豈沾沾焉求鮮之一埠頭者包藏禍心亦不待智者而後知也鮮人不與通

商不能禁俄人之奪其地以強與通商既與俄通商不得不與西洋各國通商則朝鮮非復中國之屬國矣今使以中國之兵駐防其地少則兵不足用多則彼無以餉若中朝自行運餉不惟經費難籌而滄海風濤殊多不便此計之難行者也如謂以遼兵屯皮島或雲從島或鐵山或旅順等處遙爲聲援有鞭長莫及之勢且千里救人深入無繼能保其必勝乎此亦事之無益者也且夫以大事小能結外援者策之次也不恃庇蔭力能自强者策之上也鮮京北倚叢山南環滄海忠州左右鳥竹二嶺羊腸鳥道有一夫當關之險其地非不可守也咸鏡平安二道鄰靺鞨精騎射且鷙悍耐寒苦其人非不可戰也隋煬帝以百萬之師潰於渢水唐太宗以中原全力挫於安市其地非不生將才也徒以八道之中無城者半有地而不知設險以守長衫大袖訓練無方有兵而不知束伍之法貴世官賤世役一切禁錮梟桀之材往往走敵爲患

有材而不知破格以求而國勢乃積弱而不可支強鄰乃侵侮而無所  
忌中國難於救鮮鮮人當思所以自救鮮人不知自爲謀中國當思代  
之謀使既不能復琉球復不能保朝鮮則朝鮮不滅於倭則滅於俄而  
法蘭西亦將吞我越南海外屏藩盡撤吾不知中國何以自立也今爲  
中國計當設北洋水師分防天津登萊遼東等處內固疆圉外示救援  
兼擇一韜鈴素裕威望久著之大臣暫駐其國爲之練兵練將鑄礮械  
造輪船及一切機器以適今日之用戰未可以遽言要當據險阻增城  
堡能守始能戰也破常例拔英才有人此有土也彼能自保我亦稍安  
不至唇揭而齒寒也吁朝鮮不自振興舉國皆暮氣矣不通商而自逸  
轉不若通商而知所懼也自古及今安有不憂患而可以爲國者哉

籌國論 癸未冬

或問於予曰宋欽宗以和戎而亡唐廢帝明思宗以不和而亡遼天祚

金哀宗且戰且和而亦同歸於亡其故何也予曰存亡不在和與不和而在國之強與不強敵之畏我與不畏我畏我可和輕我不可和挾制我則尤不可和畏我而不和懼困獸之猶斗此隋煬帝所以覆軍於高麗唐元宗所以喪師於南詔也輕我而與和如猛虎之離馴此關白受封所以仍擾朝鮮大同馬市所以見欺俺答也挾制我而我求和則藉口於敦睦友邦之說脫略於華夷名分之間受其辱而不恤有所求而必與權偷目前一時之安罔恤事後無窮之禍宋高宗之於女眞其前車也或又曰今法蘭西之於中國也畏我乎輕我乎抑挾制我乎曰我能與之戰則畏我不能與之戰則輕我不能與戰而先倡爲和議則彼知我之怯得借和議以挾制我此必至之勢也夫中國之見輕於西夷也久矣道光時一就欵於江甯咸豐時再就欵於京師同治庚午以天津之變而增和約光緒丙子以馬嘉理之死而增和約皆中國之受其

挾制也往者因伊犁事和俄羅斯雖未受其挾制亦不免爲所輕也且  
法人之所以敢於輕我者又因琉球之事也法人若曰日本夷琉球爲  
郡縣中國不敢過問我取越南中國能阻我乎此其所以肆行吞并而  
略無畏忌也然則中國之於法可以戰乎曰越南之爲鄰國也實屬國  
也謂之鄰國則救災卹鄰義也謂之屬國則受其貢獻捍其災患分也  
譬如士庶之家奴僕爲盜繫縛將殺而烹之爲之主者不率衆殺賊反  
憚賊之衆且強望望然去之有是理乎此不可不戰也且法人若竟滅  
安南必將擾我滇南寇我兩粵以挑釁於我則南疆自此多事倭既可  
以取我琉球法既可以取我越南則俄人即可取我朝鮮英人即可取  
我緬甸則東北西南自此多事此又不得不戰也然則和必不可行平  
曰何爲不可也必有擅淵之親征而後可以和遼必有韓范之經畧而  
後可以和夏何也彼有所畏而求和和之權在我不在彼也我 聖祖

仁皇帝之於俄羅斯也始則調朝鮮兵逐之繼則遣都統彭春攻之城  
墨爾根齊齊哈爾以防之復令喀爾喀車臣汗斷其貿易戍兵刈其禾  
稼以困之必克其城而後已至二十八年歸我雅克薩城凡黑龍江北  
興安嶺南數千里甌脫之地悉歸於我而後和議始成我朝之於準  
噶爾也一欵於烏蘭布通大捷之後再欵於西藏大捷之後三款於鄂  
爾昆河大捷之後我高宗純皇帝之征不庭也必先有傅恒岳鍾琪  
之連克碉寨而後赦娑羅奔必先有福康安海蘭察之諸路大捷而後  
赦廓爾喀必先有孫士毅之破其國都繼有暹羅國之窺其後路而後  
阮光平始可封此皆有畏我之心而求和於我我因得以挾制彼也今  
欲與之和不可不先與戰遽言和則和必難成卽成亦不可以持久我  
不言和而爲必戰之勢彼雖欲戰而亦有畏我之心如此則不受其挾  
制中國之體統得而屬國可保也子亦知今日之憂有大於此者乎古

之治國者必內安而後外攘今異端左道鴟夷姦宄之民聚衆結黨於草澤之中以待天下之有事觀釁而動以謀不利於國滇黔楚粵皖豫吳越淮徐齊魯之地固不有嘔噏會安清道友在理教龍天門之類妖言以惑人心交結營兵胥役以爲耳目此腹心肘腋之患當事泄泄然不以爲憂設中朝與法構釁兵連禍結此輩先爲戎首熛至風起雲合霧集中原先有瓦解之勢其能與外夷爭雌雄哉爲國者不患敵之輕我而患我之自輕不患敵之不我畏而患我之無可畏使中國士大夫力除其貪慾詐僞因循蒙蔽之習以講求興利除害之政去中國之所短而不以舊章禁錮師西人之所長而不以華夏矜高國勢張國本固矣彼島國安敢輕我哉吾故不畏法之強而憂中國之不自強也

治本論一

人世有一物焉雪玉不足以擬其潔糞壤不足以擬其污岱霍不足以

擬其高江河不足以擬其下矢挺不足以擬其直鉤環不足以擬其曲  
康達不足以擬其夷坎窪不足以擬其險能使理者亂亂者理能使審  
者杌杌者審懷抱於衷雖金璧積邱山章綬塞笥簏卒莫得而易焉此  
天下之至寶貴也客聆予言而咋曰如君言此殆天下之至碩乎予曰  
其物長不盈咫重不及斤渺乎小也客又曰此殆天下之至堅乎予曰  
其實非金非石非犀非珠至濡柔也客又曰此殆天下之至希乎予曰  
自渾敦以來逮於今日四海之表六合之內凡員顱方趾之倫與夫二  
足而羽四足而毛者罔不有之至衆多也客曰噫嘻我知之矣心之謂  
矣心之汚潔高下曲直夷險各造其極也人品之所殊異也而子乃言  
金璧積邱山章綬塞笥簏卒莫得而易焉可得聞乎予曰子亦知君子  
之事君乎無苟得於臨財恥苟免於臨難其心知有君國而不知有身  
家敵人雖餌以金璧章綬而不動色也子亦知小人之事君乎見利競

趨如水赴壑見害奔避如獸遇虎其心知有身家而不知有君國朝廷  
賚以金璧章綬而不感德也夫以人君之尊金璧章綬之珍而其爲數  
又多而心卒不可得無或乎目覩國用之竭心謀侵盜之巧耳未聞礮  
石之震心已潛逃潰之計身雖侍立君父之側心已趨就戎夷之廷也  
愈侵盜則國愈貧愈逃潰則師愈弱愈趨就則人愈寡愈貧愈弱愈寡  
戎夷愈侮而要挾愈酷而我之俯首聽命亦愈卑天下之日卽於杌亂  
有由來矣論者不察所由曰我中國二帝三王與我列祖列宗所  
以理天下之法不逮彼也慨然思變法以救之使海內學者咸從事於  
西人算譯聲光化電重熱之學吾亦甚喜彼學之可以致富強也然彼  
以算藝致富强者迹也而以忠信致富强者心也盡己爲忠以實爲信  
彼之所以謀國與所以事其君者有不盡己而以實者乎中國士大夫  
無彼忠信之心而學彼算藝之學吾恐法愈變愈新人心亦愈變愈汚

愈變愈下愈變愈曲而愈險而於心之廉潔高邁坦夷而正直者反鄙而迂之以爲不足一試也夫廉潔高邁坦夷正直者非能必有經世救時大畧如王景畧李衛公之儻誠未足乂安今日之天下然反乎此則危亂天下而有餘矣於危亂天下者而任以天下之事天下寧有幸乎然則今日之天下必不可治安乎是大不然宋岳飛曰文臣不愛錢武臣不惜死則天下太平矣此卽魯論所謂見利思義見危授命鄂王特質言之耳孔子舉此二語而曰可以爲成人明反乎此則不成爲人也非無人之形也無人之心也子張依此二語而曰可以爲士明反乎此則不可爲士也非無士之貌也無士之心也人誠恥其不成爲人士誠恥其不可爲士慨然曰彼夷也且以不愛錢不惜死事其君矣我夏也何反不逮則毅然變其愛錢惜死之心爲不愛錢不惜死之心秉不愛錢之心以理財縱不能遽裕今日之財而已握可以裕財之本秉不愛

錢兼不惜死之心以治兵縱不能遽強今日之兵而已植可以强兵之基政之根本固矣而後參用西人之學實事求是而盡削浮僞選任廉能而嚴黜庸墨而政之柯葉茂矣根固而柯茂彼雖有利刃銛斧不敢輕議翦伐易否之上九曰其亡其亡繫於苞桑謂其能行休美之事於否塞之時耳非然者本根既撥而技葉從之大蒙之信萬萬不可深恃懼其橫木視我各謀落其實而取其材也雖喬木豈足恃哉

### 治本論二

居今日而昌言正人心術聆者眇不嘗爲腐儒拘學迂濶遠於事情矣謂由正心而修齊而治平者古先王大學之道也執古先王大學之道用拯今日禍變此王生責蓋次公所謂太古久遠之事不用難聽之言也予謂學術者所以提醒一世之人心而人才所由出風俗所由美國運所由隆也道光之季羅忠節以正學樹幟三湘從遊者有李忠武李

勇毅王壯武劉武烈皆能屹然爲國干城而忠節忠武武烈又皆死事甚烈同時曾文正倭文端與何丹畦竇蘭皋吳竹如諸公以理學相切磨於京師迨同治初文正爲相而削平寇亂於外文端爲相而匡輔

冲主於內羣賢雲合簫管翕鳴遂成一代中興之盛由此觀之正學何負人國今國家百憂交集正由士大夫不肯稍講大學之道日以榮利迷溺其心術如墜巨石於千仞之淵而不可復出漂一葦於萬里之海而不可復覓致貪詭踵接姦弊叢苗綱絃弛弛刑義凌犯戎夷乃得乘弊而肆其毒耳設二三公輔鉅臣稍從事於學以自正其心上以小匡元后之德下以不變薄海之俗內治修整外鹵震懼縱徧小如瑞士希臘和蘭比利時猶能自立矧以畝土七百萬英方里之廣人民四百兆之衆金銀銅鉛鐵煤礦產甲於四洲之富彼敢若熊羆狒迅突我藩垣入我闔室而咥我哉吾觀於暹羅向者見逼於法已朝不慮夕矣今